

萬有文庫

第二集七百種

王雲五主編

駢體文鈔

(四)

李兆北編

商務印書館發行

駢體文鈔

(四)

李兆洛編

國學基本叢書

駢體文鈔卷二十五

【誌狀類】

王史威長葬銘

此爲埋石造端。蓋自爲之。取辨名姓而已。猶得明旌旗識之遺。

漢西都時。南宮寢殿內。有醇儒王史威長死。葬銘曰。

明明哲士。知存知亡。崇隴原甕。非寧非康。不封不樹。作靈乘光。厥銘何依。王史威長。

杜子夏臨終作文。刻石埋於墓前。

魏郡杜鄴。立志忠款。犬馬未陳。奄先草露。骨肉歸於后土。魂氣無所不之。何必故邱。然後卽化。封於長安北郭。此焉宴息。

宋臨澧侯劉使君墓誌

從續古文苑本

誌墓盛於晉代。乃所傳惟傅休奕一篇。又非全文。當以此爲權輿矣。其序次之式。亦頗可垂範。

曾祖宋孝皇帝。祖道鄰。字道鄰。侍中。太傅。長沙景王。妃高平。平陽檀氏。字憲子。諡曰景定妃。父暢。道淵。永寧令。祖貌。稚熊。瑯琊太守。合葬瑯琊。臨沂莫府山。父諱義融。字義融。領軍車騎。桂陽恭侯。夫人瑯琊臨沂王氏。字韶風。父簡。長仁。東陽太守。祖穆。伯遠。臨海太守。合葬丹徒練壁。雩山。所生母湯氏。宣城人。葬練壁。雩山。兄顓茂。道散。騎常侍。桂陽孝侯。夫人廬江潛何氏。憲英。父愉之。彥和。通直常侍。祖叔度。金紫光祿大

夫合葬練壁。雲山第三弟彪。茂蔚。祕書郎。葬江乘白山。夫人河南陽翟褚氏成班。父方回。太傅功曹。祖叔度。雍州刺史。第四弟實。茂軌。太子舍人。夫人瑯琊臨沂王氏淑婉。父津。景源。中書郎。祖虞。休仲。左衛將軍。合葬江乘白山。第五弟季。茂通。海陵太守。葬練壁。雲山夫人陳郡夏袁氏妙。父淑。陽源。太尉忠憲公。祖豹。士蔚。丹陽尹。第一姊茂徽。適陳郡長平殷臧。憲郎。父元素。南康太守。祖曠。思泰。軍功曹。重適瑯琊。臨沂王閔之。希損。鎮西主簿。父昇之。休道。都官尚書。祖敬宏。左光祿儀同。第二姊茂華。適廬江潛何求。子有祕書郎。父鎮。長宏。宜都太守。祖尚之。彥德。司空。簡穆公。第三姊茂姬。適平昌安邱孟詵。元亮。中軍參軍。離父靈休。太尉長史。祖景彥遠。丹陽尹。第四姊茂姜。適蘭陵蕭惠徽。中書郎。父思話。征西將軍。儀同三司。祖源之。君流。前將軍。第五姊茂容。適蘭陵蕭瞻。叔文。父斌。伯舊。青冀二州刺史。祖摹之。仲緒。丹陽尹。重適濟陽圉蔡康之。景仁。通直郎。父熙。元明。散騎郎。祖廓。子度。太常卿。第六妹茂姬。適濟陽考城江遜。孝言。父湛。徽淵。左光祿儀同。忠簡公。祖夷。茂遠。前將軍。湘州刺史。重適瑯琊。臨沂王法興。驃騎參軍。父翼之。季弼。廣州刺史。祖楨之。公幹。侍中。夫人濟陽考城江氏景嫺。父滾。徽源。太子洗馬。祖夷。茂遠。前將軍。湘州刺史。第一男晃。長暉。出後兄紹。封桂陽侯。第二男旻。淵高。拜臨澧侯。世子。第三男暉。淵華。第四男量。淵遂。出後第四弟實。第五男。淵頻。第六男晏。淵平。第一女麗昭。第二女麗明。第三女小字僧歸。亡葬。宋故散騎常侍護軍將軍臨澧侯劉使君墓誌。

君諱襲。字茂德。南彭城人。宋高祖武皇帝弟景王之穆也。神姿韶雅。風譽夙懋。弱冠。拜祕書郎。逮二凶肆禍。人倫道消。君身離幽執。僅免虎口。事清。還復舊職。以母憂去官。既除。又拜祕書郎。轉太子舍人。自升。

二宮。令望允緝。出爲鎮蠻護軍。廬江太守。莅政平簡。聲績兼著。遷明威將軍。安成太守。屬中流構壘。四表迷逆。君英義獨發。招會如神。故能以一□之旅。尅濟忠節。義超終古。誠冠當今。皇朝欽嘉。爵賞取榮。除輔國將軍。郢州刺史。封建陵縣開國侯。俄徵太子右衛率。加給事中。未拜。遷侍中冠軍將軍。改封臨澧縣開國侯。鎮肅石頭。實當關要之寄。遷左衛將軍。未拜。仍除中護軍。春秋卅有八。泰始六年三月十日。薨於位。聖主嗟悼。朝野傷悲。有詔。故中護軍臨澧縣開國侯志行貞純。才用理濟。忠勳著於艱時。勲績倡乎泰運。年志始壯。奄焉凶折。悲傷惻割。實兼常懷。思加寵數。以申哀榮。可贈護軍將軍。加散騎常侍。餘如故。諡曰忠侯。粵五月廿七日庚寅。將葬於瑯琊之乘武崗。以悲幽明之殊隔。傷一訣而永分。仰清徽而攬淚。愀元石而裁文。其辭曰。

峩峩□□。山岳效靈。允矣君子。誕膺休禎。支蔭帝宇。締慶文明。德以行高。仁與□□。□華二宮。官政兩服。國步時屯。艱難斯屬。忠則忘家。義實光族。朝迺欽庸。以□□□。□望旣歸。□寵惟□。或侍帝言。或司蕃戎。方宏牙美。□□家邦。如何不□。□□□躬。□芳稍述。日月有時。考辰筮吉。元堂啓基。深泉永窆。□□長悲。□□□□□□□□

宋張氏墓誌

宋故臨渭縣侯。湘東太守。張府君諱濟。夫人邱氏。諱靜姬。第三女。推兒。春秋卅有一。亡於偏憂。元徽元年十月甲辰十七日庚申。權假窆於西鄉。

遠葉蘭飛。浚源泉潔。履順早晨。含章妙歲。選史圖容。循詩範節。皎鏡冬泉。優柔春蕙。溜北忸行。營東慚藝。

冥昧慶善。宵翳壽仁。泣血實性。團憂殲身。罷景方旦。摧華載春。壠木已藹。墓草行陳。朱火幾爛。元夜無晨。江文通宋安成王右常侍劉喬墓銘

當時誌與銘。或出兩人手。故諸家集。或有銘無誌。或有誌無銘。不盡關缺佚也。

丹陽韞聖。豐鄉降賢。玉葉旣積。金徽方傳。乃毓伊人。克廣克宣。騰芬中屬。飛藻上年。杳杳虛素。永永沖關。雲意霜拍。玉立冰堅。家寶以瑩。國才未甄。參錯報善。茫昧雲元。斂魂幽石。委氣空山。膚若流波。身如絕煙。芳菲一逝。美懋徒鐫。

江文通宋光祿大夫孫奭墓銘

川祇効鏡。岳祥獻明。碧葉獨秀。瑤源自清。幼炳器譽。夙耀才名。體兼遷雲。學備儒史。紫閣咸趨。朱軒旣履。貴交慕塵。素遊企軌。騰藻上京。振彩下國。如彼綠蘭。秉芬四塞。歆人逕之不平。歎天路之冥默。貴夫君之爲美。播靈均與正則。

任彥昇劉先生夫人墓誌〇〇

旣稱萊婦。亦號鴻妻。復有令德。一與之齊。實佐君子。簪蒿杖藜。欣欣負戴。在冀之畦。居室有行。亟聞義讓。稟訓丹陽。宏風丞相。籍甚二門。風流遠尙。肇允才淑。閭德斯亮。蕪沒鄭鄉。寂寥揚冢。參差孔樹。毫末成拱。暫啓荒埏。長局幽隴。夫貴妻尊。匪爵而重。入昭明選者。都無鄙詞。

梁簡文帝華陽陶先生墓誌銘〇〇

維大同二年。龍集景辰。克明三月壬寅朔。十二日癸丑巳時。華陽洞陶先生。蟬蛻於茅山朱陽館。先生諱

宏景字通明。春秋八十有一。屈伸如恒。顏色不變。有制。贈以中散大夫。謚曰貞白先生。遺舍人主書。監護喪事。十四日巳時。窆於雷平之山。若夫真以歸空爲美。道以無形爲貴。不知悅生。大德所以爲生。不知惡死。谷神所以不死。妙哉隱顯變化。物莫能測。旣而岫開坼石。天墜玉棺。銀書息簡。流珠罷竈。九節麗於空中。千和焚於地下。僊官有得朋之喜。受學振臨谷之悲。余昔在粉壤。早逢圯上之術。今筵元良。屢稟浮邱之教。握留符而惻愴。思化杖而酸辛。乃爲銘曰。

無名曰道。不死爲仙。亦有元放。兼稱稚川。遁形解化。自昔同然。猗歟夫子。受籙歸元。梨傳苑吏。書因賈船。虎車照景。蜺拂淩煙。餘花灼爍。春澗潺湲。鬱鬱茅嶺。悠悠洞天。三山白鶴。何時復旋。秀若芝英

梁簡文帝戎昭將軍劉顯墓銘

鍊句頗與鮑近

繁弱挺質。空桑吐聲。分器見重。播樂傳名。誰其均之。美有髦士。禮著幼年。業明壯齒。厭飫典墳。研精名理。一見弗忘。過目則記。若訪賈逵。如問伯始。穎脫斯出。學優則仕。議獄旣佐。芸蘭乃握。搏鳳池水。推羊太學。內參禁中。外相藩岳。斜光已迫。殞彼西浮。百川到海。還逐東流。營營返魄。汎汎虛舟。白馬向郊。丹旒背輦。野埃興伏。山雲輕重。呂掩書墳。揚歸元冢。爾其戒行途。窮土壠。弱葛方施。叢柯日拱。遂柳萸春。禽寒斂翫。長空常暗。陰泉獨湧。耐彼故塋。流芬相踵。

梁元帝庾先生承先墓誌

悠哉掌庾。興自陶唐。伯舅居晉。連鑣渭陽。爰斯厥後。世挺珪璋。乃登靈岳。言遵洞府。乃涉石山。將從輕舉。實惟貞吉。實惟退讓。皎皎不羣。超超高尚。本同壽夭。寧論得喪。諸方未遊。佳城已望。蓬生蔣徑。鈞罷磻谿。

檀悲新壠。桃餘故蹊。風翻嶺背。月下松西。揚名不朽。高蹈夷齊。

梁元帝侍中吳平光侯墓誌銘○

惟嶽降神。表山甫之德。敬如君所。顯成季之徵。潔靜精微。岐嶷天挺。學兼義府。談均理窟。歷太子洗馬。八人掌籍。爲崇賢之領袖。五日來朝。冠承華之楷模。遷豫章內史。法井鸞峯。甘露歲下。蕭崖鶴嶺。連理成陰。徵爲太子左衛率。遭疾薨於道。頗類陶基。民號燕北。取譬羊祜。巷哭荆南。副軍早垂隆眄。憫其石火。瞻斯翠蓋。忽變丹旒。方使桓侯石椁。載銘盛夏。滕令佳城。式鐫韶濩。已開四傑

溫鵬舉司徒元樹墓誌銘

昔樞電降祥。姬水成業。握八符以馭世。膺五命以會昌。欽明格於上下。光澤被於宇宙。卜年永久。歷世遐長。有文王之孫子。啓周公之苗裔。積善所及。踵武稱賢。每以辛李爲言。恒持韓白自許。殫百慮之一致。盡能事於生民。蒼蒼在上。義歸無厚。徒有東平避世之意。空懷北海自晦之情。疾非逢霧。終異啓手。銘曰。明允篤誠。發於岐嶷。未鏤已雕。不扶而直。修理以耕。強學爲殖。孔既歎魯。莊亦吟越。況以度思。有懷明發。翻然高舉。歸於魏闕。長路未窮。朝光已沒。

徐修仁故永陽敬太妃墓誌銘○

永陽大太妃王氏。瑯琊臨沂人也。其先周靈王之後。自秦漢逮於晉宋。世戴光□。羽儀相屬。旣以備於前志。故可得而略焉。祖粹。給事黃門侍郎。父儼。左將軍司馬。尋陽內史。並見稱時輩。太妃體中和之氣。稟華宗之烈。蹈此溫恭。表茲淑慎。孝敬資於冥發。仁愛□於自然。至乎四教六訓之閑。工言貞婉之德。無待教

成罔不該備。故景行著於中。淑問顯乎言歸。作嬪盛德。實光輔佐。親縫幕之用。躬服澣之勤。及早世釐居。遺孤載藐。提攜撫育。逮乎成備。斷織之訓。旣明。闔門之禮。斯洽。劬勞必盡。曾不移志。用能緝睦於中外。亦以宏濟乎艱難。雖魯姜之勤節。曹妃之敬讓。方之蔑如也。皇業有造。殷憂啓聖。追惟魯衛。建國永陽。恭王纂嗣。蕃號式顯。乃拜爲太妃。策曰。維天監二年六月甲午朔十日癸卯。皇帝遣宗室員外散騎侍郎持節兼散騎常侍蕭敬寶。策命永陽王母王氏爲國太妃。曰。於戲。惟爾茂德內湛。粹範外昭。國序凝芬。蕃庭仰訓。是用式遵舊典。載章徽服。往欽哉。肅茲休烈。可不慎歟。備榆璫之華。而降心彌約。居千乘之貴。而處物愈厚。旣而恭王不永。禮從□□。訓導嗣孫。載光榮祉。年高事重。志義方隆。宜永綏福履。而奄奪鴻慶。以普通元年十月廿三日。遭疾。十一月九日己卯。薨於第。春秋五十有九。詔曰。永陽大太妃奄至薨逝。哀摧切割。不能自勝。便出敍哀。可給東園祕器。喪事所須。隨由□辦。祖行有辰。式宏茂典。又詔曰。故永陽大太妃禮數有殊。德行惟光。訓範蕃嗣。式盛母儀。卽遠戒期。悲懷抽割。可詳典故。以隆嘉謚。禮也。粵其月廿八日戊戌。祔瘞於瑯琊臨沂縣長千里黃鵠山。用宣風烈。以昭弗朽。迺爲銘曰。

清瀾悠邈。其儀尙矣。龍光疊照。風流世祀。猗歟罔匱。於昭不已。誕資仁淑。作嬪君子。幽閑表操。明德自躬。推厚處薄。秉默居沖。參差採芼。揜映言工。鑒昭彤管。識懋休風。凝芬載湛。芳猷允塞。徙舍爲訓。止閭成則。曹號母儀。豈伊婦德。穆茲閨闈。形於邦國。龍飛集運。禮數攸鍾。憲章盛典。車服有容。泰而愈約。貴則彌恭。蕃祉方茂。纂嗣克重。巾帶差池。朝夕咸事。雖曰任傳。永請斯備。是惟仁姑。厥德可庇。恂恂濟濟。蘭芬瓊祀。光陰易晚。祺福難留。閨儀罷映。褵華奄收。奠遷朱邸。駕指行楸。芳□是勒。大□方攸。尙用漢人渠嫺亦可謂虎賁中郎矣。

北魏崔敬邕墓誌銘○

祖秀才諱殊字敬異

夫人從事中郎趙國李休女

父雙護中書侍郎冠軍將軍豫州刺史安平敬侯

夫人中書趙國李詵女

魏故持節龍驤將軍督營州諸軍事營州刺史征虜將軍大中大夫臨青男崔公之墓誌銘

君諱敬邕博陵安平人也夫其殖姓之始蓋炎帝之允其在隆周遠祖尙父實作太師秉旄鷹揚尅佐攬殷若乃遠源之富奕世之美故以備之前冊不待詳錄君卽豫州刺史安平敬侯之子胄積仁之基累榮構之峻特稟清貞少播令譽然諾之信著於童孺瑤音玉震聞於弱冠年廿八而儔華茂實以響流於京夏矣被旨起家召爲司徒府主簿納贊槐衡能和鼎味俄而轉尙書都官郎中時高祖孝文皇帝將改制創物大崇革正復以君兼吏部郎詮敍彝倫九流斯順太和廿二年春宣武皇帝副光崇正妙簡宮衛復以君爲東朝步兵景明初丁母憂還家居喪致毀幾於滅性服終朝廷以君膽量凝果善謀好成臨事發奇前略無滯徵君拜爲左中郎將大都督中山王刺史出圍僞義陽城拔凱旋君有協規之効功績隆盛授龍驤將軍太府少卿臨青男忠勲之稱實顯於茲永平初聖主以遼海戎夷宣化佇賢肅慎契丹必也綏接於是除君持節營州刺史將軍如故君軒鑣始邁聲猷以先麾蓋踐壇而溫膏均被於是殊俗知仁荒嶠識澤惠液達於逋遐德潤潭於邊服延昌四年以君清政懷柔宣風自遠徵君爲征虜將軍太中大

夫方授美任。而君嬰疾連歲。遂以熙平二年十一月廿一日卒於位。縉紳痛惜。嫺舊咸酸。依君績行。蒙贈左將軍。濟州刺史。加諡曰貞禮也。孤息伯茂。銜哀在疚。摧號罔訴。泣庭訓之崩沈。淚松楊之以樹洞。抽絕其何言。刊遣德於泉路。其辭曰。

縣哉遐胄。帝炎之緒。爰歷姬初。祖惟尙父。曰周曰漢。榮光繼武。邁德傳輝。儒賢代舉。於穆睿考。誕質含靈。秉仁岳峻。動智淵明。育善以和。獎幹以貞。響發邦丘。翼起槐庭。慶鍾盛世。皇澤遠融。入參彞敍。出佐邊戎。謀成轅幕。績著軍功。僞城颺偃。蠱境懷風。王恩流賞。作捍東荒。惠沾海服。愛洽遼鄉。天情方渥。簡爵惟良。如何倉昊。國寶淪光。白楊晦以籠雲。松區杳而煙遂。藐孤叫其崩惋。親賓颯而垂淚。仰層穹而摧號。痛尊靈之長祕。誌遺德兮何陳。篆幽石兮深墜。嗚呼哀哉。

北魏碑版古法尙存提撮鋪陳未始不意在變化

北魏故懷令李君墓誌銘

○模至

君諱超。字景昇。本字景宗。後承始族叔在江左者。懸同。故避改云。秦州隴西郡狄道縣都鄉華風里人也。雅著高節。敦襲世風。言行足師。興作成淮。修情孝友。因心名義。安貧樂道。息詭遇之襟。介然峻特。標確焉之操。弱冠舉司州秀才。拜奉朝請。除恒農郡冠軍府錄事參軍事。宰沁水縣。巨政崇治。綽居尤最。爲受罪者所誣章。憲臺誤聽。被茲深劾。除名爲民。於是廿年中。浮沉閭巷。玉潔金志。卓爾無悶。到熙平二年。甫更從宦。補荊州前將軍騎兵參軍事。復作懷令。已受拜。垂垂述職。遭疾。正光五年八月十八日。卒於洛陽縣之永年里宅。時年六十一。孤貞華首。訖於二邑。門從無兩。遠邇酸恨。懷之百姓。長慕喪氣。雖陳留之哀望。胡季容。不是過也。越六年正月丙午朔十六日辛酉。葬洛陽縣覆舟山之東南。元壤難窮。陵谷時異。刻茲

陰石照序光塵

泱泱顯族。斂蔓西垂。代襲清則。杳炳羽儀。道妙之門。緒風屬斯。惟祖惟考。倜儻瓌奇。昌謨迭駕。高鑒明規。杳量无隄。元契不貲。總修異貫。員應紛枝。灼灼伊君。山立淵淳。棲真宅正。窺繩履程。懿鑠爲質。醇素用情。均治禮世。氣重財輕。亦旣從招。旁溢鴻聲。隨牒出入。密勿力誠。爰莅近邑。先邁儀形。絕交獨坐。化動陰冥。尙德貽咎。衆實叵蓋。拂衽歸來。飭轅褫帶。恂恂鄉閭。万殊一會。優柔善成。无小无大。垂白再仕。汎爾沿流。階倫稍降。盛業愈邁。遜作後城。士女承休。轡頓方馳。盡土悲愁。尅節炯言。引賞靡徵。端恭安珥。家俗虛膺。擢彼圯跡。事罕篇繒。長源未輸。深圖乍卷。蘊此逸機。空生徒返。茲冤易削。疇毒難遣。楨榦疎疎。泉房寒遠。孀孤內爛。妹弟摧頤。式鏤沈石。託注幽篆。

妻恒農楊氏。父談。爲郟州主簿。息女孟宜。年卅六。適恒農王始儁。郡中正。息女媛姿。適遼西常彪。侍御史。息女仲妃。適武威賈子謐。涼州治中。息道冲。息女婉華。息女休顏。息女四輝。息道逸。年十六。息道栖。年十三。

庚子山周大將軍懷德公吳明徹墓誌銘

○○○點鬼。有難言之隱。無不盡之。辭風曲洞達。此之謂開府清新。

同病相憐。故言哀入痛。誌文絕唱也。

公諱明徹。字通昭。兖州秦郡人也。西都列國。長沙王公被山河。東京貴臣。大司馬名高霄漢。豈直西河有守。智足抗秦。建平有城。威能動晉而已也。祖尙南譙太守。父標。右軍將軍。抗拒淮沂。平夷濟漯。代爲名將。見於斯矣。公志氣縱橫。風情倜儻。圯僑取履。早見兵書。竹林逢猿。偏知劍術。故得勇爵登朝。材官入選。起

家東宮司直。後除左軍。葛瞻始嗣兵戈。仍遭蜀滅。陸機纔論功業。卽值吳亡。公之仕梁。末爲達也。自梁受終。齊卿得政。禮樂征伐。咸歸舜後。是以威加四海。德教諸侯。蕭索煙雲。光華日月。公以明略佐時。雄圖贊務。鱗翼更張。風颺遂遠。冠軍侯之用兵。未必師古。武安君之養士。能得人心。擬於其倫。公之謂矣。爲左衛將軍。尋遷鎮軍。丹陽尹。北軍中候。總政六師。河南京尹。冠冕百郡。文武是寄。公無愧焉。蕭湘之役。馮陵島嶼。風船火艦。周瑜有赤壁之兵。蓋舳艫。魏齊有橫江之戰。仍爲平南將軍。開府儀同三司。都督湘衡桂武四州刺史。遂得左廣迴局。轡車反暢。長沙楚鐵。更入兵欄。洞浦藏犀。還輸甲庫。雖復戎歌屢凱。軍幕猶張。淮南望廷尉之囚。合淝稱將軍之寇。莫不失穴驚巢。沉水陷火。爲使持節。侍中。司空。車騎大將軍。都督南北。兗青譙五州諸軍事。南兗州刺史。南平郡開國公。食邑八千戶。鼓吹一部。中台在元武之宮。上將列文昌之宿。高蟬臨鬢。吟鷺陪軒。平陽之邑。萬家臨淄之馬。千駟坐則玉案推食。行則中分麾下。生平若此。功業是焉。旣而金精氣壯。師出有名。石鼓聲高。兵交可遠。故得艫舳所臨。蓋於淮泗。旌旗所襲。奄有龜蒙。魏將已奔。猶書馬陵之樹。齊師其遁。空望平陰之烏。俄而南仲出車。方叔涖止。暢轂文茵。鉤膺幃革。遂以天道在北。南風不競。昔者裨將失律。衛將軍於是待罪。中軍爭濟。荀桓子於焉受戮。心之憂矣。胡以事君。宣政元年。屆於東都之亭。有詔釋其鸞鑣。燭其釁社。始宏就館之禮。卽受登壇之策。拜持節大將軍。懷德郡開國公。邑二千戶。歸平津之館。時聞櫜馬之嘶。舍廣成之傳。裁見諸侯之客。廉頗眷戀。寧聞更用之期。李廣盤桓。無復前驅之望。霸陵醉尉。侵辱可知。東陵故侯。生平已矣。大象二年七月二十八日。氣疾暴增。奄然賓館。春秋七十七。卽以其年八月十九日。寄瘞於京兆萬年縣之東郊。詔贈某官。諡某禮也。江東八

千子弟從項籍而不歸。海島五百軍人爲田橫而俱死焉。嗚呼哀哉。毛修之埋於塞表。流落不存。陸平原敗於河橋。死生慚恨。反公孫之柩。方且未期。歸連尹之尸。竟知何日。遊魂羈旅。足傷溫序之心。元夜思歸。終有蘇韶之夢。遂使廣平之里。永滯冤魂。汝南之亭。長聞夜哭。嗚呼哀哉。乃爲銘曰。

九河宅土。三江貢職。彼美中邦。君之封殖。負才矜智。乘危恃力。浮磬戢鱗。孤桐垂翼。五兵早竭。一鼓前衰。移營滅竈。空幕禽飛。羊皮詎贖。畫馬何追。荀罃永去。隨會無歸。存沒俄頃。光陰悽愴。岳裂中台。星空中將。眷言妻子。悠然亭障。魂或可招。喪何可望。壯志沉淪。雄圖埋沒。西隴足抵。黃塵碎骨。何處池臺。誰家風月。墳塋羈遠。營魂流寓。霸岸無封。平林不樹。壯士之隴。將軍之墓。何代何年。還成武庫。

庾子山周大將軍義興公蕭公墓誌銘

昔司徒之敷五教。當堯讓之初。丞相之總萬機。值秦亡之後。若殷人受氏。乃承微子之封。梁運應圖。實啓延陵之國。公諱太字世怡。蘭陵人也。太祖文皇帝之孫。鄱陽忠烈王之子。派別天潢。支分若木。直幹自高。澄源已遠。茂親明德。是稱毛畢之功。宗子維城。乃建邢茅之國。大同元年。年十六。封豐城縣開國侯。食邑五百戶。山臨鶴塞。非無陶侃之賓。氣連牛斗。卽有張華之劍。解褐給事中。仍太子洗馬。公子出身。非郎官而同品。中朝洗馬。異式道而前驅。以公居之。誠爲高選。大同元年。入直殿省。其年。轉太子中書舍人。南宮宿衛。職司蘭錡。北閣從班。榮參顧問。通籍兩宮。得賢斯在。大同三年。授持節仁威將軍。譙州刺史。褰帷祥氣之境。刺舉消憂之地。南陽風俗。文學更多。美稷相迎。童兒逾遠。旣而亂離瘼矣。王室騷然。大夫有行役之悲。君子有無期之怨。背關懷楚。扁舟而行。江漢奉當璧之君。章華歸中興之主。承聖元年。拜侍中。無雙

對問。實踵武於丁鴻。多識舊章。足齊衡於王粲。二年。除持節平西將軍。臨川內史。仍轉平南將軍。桂陽內史。尙方鑄劍。再轉金龜。御史分符。雙封銅虎。豈直鄧攸清白。見稱五鼓之歌。劉寵廉能。名爲一錢之郡。遂以天保未定。王途多梗。還吳不可。歸蜀無路。臨淄負海。翻然改途。竄身清漳。垂翅渤海。蒙授車騎大將軍。散騎常侍。仍爲持節都督永州刺史。而秦亭壓境。邾柝聞城。鼓角地鳴。將軍天落。雖復瓶缶聽聲。無防於地道。冠繩柴結。不却於雲梯。請命受降。翻歸都護。周朝以楚材晉用。不停於平章。趙璧秦求。無論於羈遠。以保定五年。除使持節。驃騎大將軍。開府儀同三司。義興郡開國公。食邑一千三百戶。天和二年。授使持節。都督蔡州諸軍事。蔡州刺史。楚頃襄之愛子。旣布衣而戍谷。魏安釐之母弟。亦羈旅於邯鄲。憂旣傷人。降年不永。春秋五十有一。薨於蔡州之鎮。送故入關。空餘袞服。歸軒在道。還更垂帷。嗚呼哀哉。有詔贈官。諡某禮也。五年十一月。葬於長安北原。樗里子之墳。正臨武庫。太史公之墓。直對皋門。銘曰。

元鳥遠烈。相土宏謨。東封宋社。西斂秦圖。人承佐漢。國紹開吳。有美令德。茂親藩邸。建國皇支。承家帝弟。率由冥會。亮直天啓。轅固聞詩。唐都習禮。博望之苑。金華之宮。文林講德。武帳參戎。名書柱上。策滿帷中。託身滛右。蒞政淮東。秦亭西逼。楚澤南窮。時驚獵火。或懼秋風。屬期遠略。逢茲應變。陣橫十里。兵圍一面。月暈孤城。塵驚虛援。春筍非糧。秋蒿無箭。垂翅臥龍。夷衿輟戰。時值懷來。恩加始賞。王爵愈峻。戎章更上。朱鷺才飛。虞歌卽嚮。泣子留恨。藏書長往。炎涼迭運。零落山邱。霜芬幕月。松氣陵秋。嗟南國之王子。成東

陵之故侯。

情事相副。碑文肅穆之體。漸改志銘。訛宕之能始彰。

庾子山周大將軍瑯琊定公司馬裔墓誌銘

公諱裔字遵允河內溫人也南正司天北正司地是謂義和之官卽嗣重黎之政卽之歸楚與章邯而並封豫之避秦共毛公而俱去祖金龍仍居選部水鏡三臺父悅再牧荊河威風千里而身遭禍機遂爲季布所哭獲存遺嗣實賴程嬰之忠國家追念功臣更撫叔敖之子言思官族還求女齊之允公始應辟爲河內功曹除員外郎常侍汲郡治兵黃河浮馬摧鋒軼關之捷逐北長城之陣授平東將軍北徐州刺史柳泉風塵三城席卷棠陰鋒鏑千室入關遷車騎大將軍儀同三司開國龍門縣伯仍除巴州刺史雖復巴水三迴夷歌數曲徒逢白竹之弩已濟青衣之功朝廷以漢之功臣須開上將之府晉之代冑宜紹瑯琊之國遷驃騎大將軍開府改封瑯琊公食邑一千五百戶宮闈近密實俟忠貞詔爲大御伯仍除大御正職司常伯任總夔龍王道旣平絲言惟允尋除始州刺史都督始州諸軍事蠻夷恃險狼顧鴟張高山尋雲深谷無景九地縱橫三門起伏峯危馬束水險橋飛遂得谷靜山空冰消霧散仍爲信州刺史都督信州諸軍事精兵守於白帝足懼巴州之城船梯下於荊州彌動西陵之戍卽授使持節大將軍都督西寧州諸軍事西寧州刺史將啓北戶之人向通雲南之國聞寵若驚奄從深夜天和六年正月十八日亡春秋六十五詔贈本官加懷邵汾晉四州刺史諡定公禮也以建德元年七月十三日葬於武功郡之三疇原公愛敬純深有隱無犯忠貞亮直知無不爲在戎四十二年身經六十九戰至於多竈唱籌並得成功飛沙擁石未嘗乖律恂恂教義吳起西河之風閑閑旗鼓李牧長平之政身死之日家無餘財山水所資一由詔葬有始有卒生榮死哀銘曰蕭瑟嵯峨佗家所無遂以成家祝融是命重黎克舉公族乃建天官卽序避世於秦成家於楚金行失馭玉鏡淪輝我之烈祖識變乘機

黃旗東沒。青蓋西飛。落星置道。長州出圍。及我皇父。荆河再撫。世遭喪亂。身沒猾豎。嗟我遺嗣。崎嶇趙武。寒覆鳥翼。飢吞獸乳。獲歸河內。更襲瑯琊。年方小馬。怨結長蛇。藏兵九地。置劍千家。雪山埋馬。冰河陷車。旣乃班政。超然榮守。朱鷺頻飛。金龜轉紐。築塞長榆。營軍高柳。玉案推食。河橋勸酒。石門冰釋。金隄電散。蘆水門關。茅津成觀。馭風逸翮。修途始半。建武功臣。先悲吳漢。沉寥搖落。游揚浸微。金城路斷。郿塢人稀。風松雲蓋。白水山衣。賢亡星隕。人沒蘭衰。

銘與志大略相同唐初亦爾

庾子山周譙國公夫人步陸孤氏墓誌銘○

夫人諱某。字某。本姓陸。孤郡人也。大夫拓境。百越來庭。丞相勒兵。三江席卷。高祖載爲。劉義真長史。留鎮關中。旣沒赫連。因卽仕魏。臨終。誠其子孫曰。樂操風土。不忘本也。言念爾祖。無違此心。祖政。驃騎大將軍。儀同三司。恆州刺史。父通。柱國大將軍。大司馬。文安公。匡贊經綸。參謀揖讓。名高廣武。功重長平。夫人七德含章。四星連曜。敬愛天情。言容禮典。九日登高。作銘秋菊。三元告始。或頌春椒。年十有四。娉於譙國。友其琴瑟。愈恭節儉之心。伐其條枚。實秉憂勤之德。鄴地登高之錦。自濯江波。平陽采桑之津。躬勞蠶月。天和元年。冊拜譙國夫人。東武亭之妻。旣稱有秩。南城侯之婦。還聞受封。柱國殿下。以名華分照。增城峻土。揚旌熨道。問政邛都。白狼之溪。途艱黃牛之坂。荔枝之山地險。葡萄之國。夫人別離親戚。關河重阻。夷歌一曲。未足消憂。猿鳴三聲。沾衣無已。是以天厲之疾。遂成沉痾。玉瀝難開。金膏實遠。建德元年七月九日。薨於成都私第。春秋三十有一。卽以其年十一月二十二日。歸葬長安之北原。詔贈譙國夫人。禮也。殿下神傷秋月。掩淚長松。周季直之留書。更深冥漠。潘安仁之詞藻。徒增哀怨。豈直西河女子。獨見銀臺。東海